

原輯南獄志廿六卷

第七冊

南嶽志卷十一

平江李元度原輯衡山

王香余
歐陽謙校刊

前獻二

范純仁

范純仁字堯夫吳人文正公仲淹子也官尚書左丞謚忠宣事具
宋史本傳紹聖四年忠宣坐黨籍謫武安軍節度副使永州安置
時病失明怡然就道嘗謁衡嶽廟有祭衡嶽文存集中

文曰維紹聖四年歲次丁丑四月甲申朔十一日甲午責授武
安軍節度副使永州安置范某謹檣首上啟南嶽司天昭聖帝
伏念臣幼承父訓長服朝紳從宦四十五年歷官三十一任每

願竭忠而報國常思懲惡以安人然而賦性不明涉道未至智難周物事靡盡情長郡邑則慮刑罰過中居臺諫則恐議論失當備使寄則有按察不明而吏民受弊專帥權則有戰守寡謀而番漢罹殃及遭遇於兩宮遂叨塵於三事再爲真相各僅彌年然而識昧幾微性資孱懦智及而仁不能守言出而躬不逮行致君之效蔑聞及物之功蓋寡知難而退冒寵尙優負朝廷拔擢之私失士民期望之意德薄祿厚恩重報輕積罪疊之浸深宜蓄殃之併至今蒙削除祿秩投竄遐方適當垂死之年無復全生之望雙瞳矇瞖百口流離同氣阻急難之情病妻乖將養之便屯難已極憂懼未涯非人事之可圖庶陰靈之或佑今

者奔之貶所甫邇靈山是敢直罄危誠仰干神造伏惟尊神鎮奠南服司主離方分持造化之權平施善惡之報伏望察其素志原其本心無造作邪險之愆皆暗懦依違之咎特加矜宥少追譴誅微軀早遂於生還病室速諧於痊愈兄弟獲會合之樂子孫享平泰之祥螻蟻之誠威靈是託

鄒浩

鄒浩字志完號道鄉常州晉陵人第進士哲宗親擢爲右正言時章惇獨相用事威虐震赫浩所言每觸惇忌仍上章露劾其不忠慢上之罪未報而賢妃劉氏立爲后浩極陳其不可帝謂此亦祖宗故事豈獨朕躬對曰祖宗大德可法者多矣陛下不之取而效

其小疵臣恐貽後世之責也帝變色猶不怒持其章四顧若有所
思明曰章惇詆其狂妄乃削官羈管新州浩南遷過潭州止宿時
溫益知潭州遣州都監將數卒夜出城逼使登舟去乃凌風絕江
投嶽麓寺寺僧列炬迎之後張栻知潭建臺以表之朱子書道鄉
臺三字於碑明萬曆丁巳裔孫志隆來爲提學道乃捐俸建祠祀
之浩官至寶文閣待制特諡曰忠嘗遊南嶽有衡嶽寺大殿記存
集中

記曰衡嶽寺實梁海尊者道場唐德宗賜寺額本朝改律爲禪
元祐初主僧道辨念佛付囑誓以興起而大殿者馬氏之所建
也歷年茲多棟撓不支不足以嚴奉世尊導人歸向辨亟以爲

先務選於其徒得知和者丐力於樂施之人時耒隕李仲賀財
雄一方病牯積年良苦一夕夢僧自南嶽來求供曰吾梁海尊
者如所求牯立愈李方覺而和及門竦然異之語以其故和適
有藥服之果愈於是殿之製作當鼎新者李畢以爲已任始於
歲庚午成於歲癸酉造其宇者疑兜率院宮移在人境瞻其像
者疑 佛菩薩眾出現世間慢者虔恭謗者贊歎十不善業靡然
善矣辨沒義臻奉能繼踵住持廣堂以說妙法高閣以藏御書
長廊以環繞於外亦賴李而一新焉李之三子修攸倚又咸率
父志圖維纖悉無吝色余初入湖湘聞耒陽士李修弟兄勇先
甲族出錢以完學舍分田以裕學糧致一邑之士惟德行道藝

之知而無他營固已賢其所爲及經衡嶽詢覽形勝又得其父子本末如此觀夫爲我之弊有拔一毛可以利天下而不爲者其弊至於無君此有識之所共嗤而前聖之所深辨也李氏乃能不愛其貲獨成寺事俾僧若俗於以作禮祝天子億萬年與南山同壽豈不重可賢邪然則尊者所以兆於其夢信非偶然故因奉能請記而並載之

李觀

李觀元祐間司馬溫公薦之除知虔州不就請監南嶽廟

黃庭堅

黃庭堅字魯直分甯人治平中進士官朝奉郎知太平州贈龍圖

閩學士謚文節事具宋史本傳文節謫宜州時曾遊南嶽詳所著南行錄中有登祝融峯遊勝業寺詩又嘗禮思大禪師三生塔刻石題名又嘗跋法輪寺古碑重書於石

張耒

張耒字文潛淮陰人弱冠第進士官至起居舍人以太常少卿出知潁州汝州事具宋史文苑傳耒幼穎異十三歲能爲文從蘇軾游軾稱其文汪洋冲澹有一唱三歎之音在潁聞軾訃爲舉哀行服遂貶房州別駕自二蘇及黃晁輩相繼歿惟耒存士人就學者衆分日載酒殽飲食之晚監南嶽廟卒贈集賢殿修撰

胡安國

胡安國字康侯崇安人徙居潭州紹興四年登進士哲宗親擢爲第三提舉湖南學事忤蔡京除名高宗時除給事中會朱勝非相安國遂歸後再起進寶文閣直學士卒年六十五諡文定從祀孔廟文定提學行部時過衡嶽欲一登覽已戒行矣旣而曰非職事所在也卽止及除名後始縱遊衡山買地結廬以居讀書紫雲峯下築碧泉書堂著春秋傳十五年不出嘗藉坐一石間宛轉屬吟悠然自得尋上所纂春秋傳高宗謂深得聖人之旨所與遊者游酢謝良佐楊時皆程門高弟也良佐嘗語人曰胡康侯如大冬嚴雪百草萎死而松相挺然獨秀子三人寅甯宏黃宗義撰宋元學案述先生師友淵源曰武夷學案

張孝祥

張孝祥字定國號于湖歷陽人直秘閣淮南轉運通判祁之子也紹興中舉進士第一官粵西經略又嘗知潭州丙戌秋還自桂林經衡岳凡所遊觀皆畱詩題名大書而深刻之今刻水簾洞者二一曰鎮嶽飛天法輪一曰朱陵太虛洞天又嘗題名於石鼓山麓今並存

胡銓

胡銓字邦衡號澹庵廬陵人建炎二年進士樞密院編修官謫忠簡事具宋史本傳忠簡嘗抗疏劾秦檜主和議誤國直聲震天下金人購其疏千金坐除名編管新州檜死量移衡州寓居西湖寺

與衡士講學時周覽衡嶽之勝今集賢書院有公栗主與李鄴侯韓昌黎趙清獻陳忠肅周元公胡文定朱文公張宣公合祀一堂公再起至集英殿修撰知泉州與祠嘗學春秋於胡文定著春秋集善十一卷張魏公爲之後序

王存

王存字正仲丹陽人慶厯六年進士官至吏部尙書宋史有傳存官同知太常禮院時當熙寧九年十一月以安南行營將士疾疫詔遣存往禱南嶽并遣中使建祈福道場

陳師錫

福建通志陳師錫字伯修建陽人熙寧九年進士第三人元祐間

用蘇軾薦除祕書省校書郎徽宗立擢殿中侍御史疏劾章惇蔡京劾京疏凡五上皆不省出知廬州京入相坐黨籍謫監衡州酒稅遇赦監潭州南嶽廟

丁南一

福建通志丁南一字宗傑莆田人幼誦漢書日萬字年十三有聲鄉校寶祐元年特奏名授懷安縣尉以介特忤上官改監南嶽廟

胡寅

胡寅字明仲安國從兄湻之子生時其母以多男欲不舉安國之母夢大魚躍盆中急往救之命安國取而子之少受業於楊時宣和三年第進士歷校書郎遷員外金人陷汴京立張邦昌寅棄官

歸言者劾其離次奪官建炎元年擢起居郎應詔上十事不報尋命知永州累官禮部侍郎徽猷閣直學士會秦檜當國乞致仕歸隱衡山卒年五十九諡文忠事具宋史列傳學者稱致堂先生黃宗羲述其師友淵源爲衡麓學案著有讀史管見論語詳說諸書初致堂嘗遊嶽麓寺大書閣壁云是何南海之鱷魚來作長沙之鵬鳥帥臣劉旦潮陽人也見之大怒復譖寅於檜坐是落職二十年

〔案〕宋史誤以涪爲康侯從弟又誤以夢魚躍盆中者爲康侯之妻福建通志據朱子所作胡寅行狀及致堂文集正之

胡宏

胡宏字仁仲安國季子幼穎敏年十五自爲論語說旣冠遊太學
受業於楊時侯師聖卒傳其父之學優游衡山二十餘年玩心神
明不舍晝夜張栻師事之紹興間上書言時事辭極切至先是宏
以廕補承務郎不調父憂服闋求爲嶽麓山長秦檜當國貽書其
兄寅問二弟胡不通書意欲用之寅復書止敘契好而已宏書辭
甚厲人問之宏曰正恐其召故示之以不可召耳檜死宏被召仍
以疾辭監潭州南嶽廟卒諡曰明事具宋史列傳著胡子知言及
皇王大紀八十卷文集五卷學者稱五峯先生黃宗羲爲作五峯
學案

胡憲

宋史本傳胡憲字原仲崇安人從從父胡安國學紹興中以鄉貢入太學會伊洛學有禁憲獨陰與劉勉之誦習其說一日揖諸生歸故山力田賣藥以奉其親安國稱其有隱君子之操從遊者曰眾號籍溪先生上特召之以母老辭尋特賜進士出身授左迪功郎建州教授不得已就職居七年以母年高不樂居官舍求監南嶽廟以歸後官秘書省正字初憲與劉勉之俱隱後又與劉子翬朱松交松將沒屬其子熹受學於憲及勉之子輩熹自謂從三君子遊而事籍溪先生爲最久云卒謚靖肅朱子爲作行狀

胡憲

宋元學案胡憲字和仲文定次子學者稱茅堂先生以蔭補官試

館職除祠部郎知澧州不赴文定隱衡嶽作春秋傳纂修蒐討盡出先生手又自著春秋通旨輔傳而行吳淵穎謂欲觀正傳必先求之通旨秦檜嘗謂茅堂曰先公春秋議論好只是行不得對曰惟其可行方是議論又問柳下惠降志辱身如何對曰總不若夷齊之不降不辱也遂以書勸避相位檜愈怒未幾臺章下矣

至氏祖望曰致堂籍溪五峯茅堂四先生並以大儒隱衡嶽樹節南宋之初當時伊洛世適莫有過於文定一門者四先生沒後廣仲尙能傳其家學而伯逢季立隨兄遊於朱張之門稱高弟焉可謂盛矣

韓璜

宋元學案韓璜字叔夏潁川人忠獻公之後也南渡後居衡山累官廣西提刑知諫院胡文定來衡嶽先生從學於碧泉書堂而與致堂侍郎尤相善致堂稱其壁立無所汙染又嘗薦之執政及在言路以忤秦檜出築室衡湘與致堂及向秘閣宣卿時相過從稱三友

全氏祖望曰北宋公相家之盛莫如呂氏韓氏其子孫皆能以學統光大之呂氏則滎陽學於伊川紫薇學於龜山廣平諸公仁武德元學於和靖而韓氏則德全學於元城叔夏學於文定无咎學於和靖而東萊又爲无咎之壻皆佳話也

李椿